



ILIDŽA

INFORMATIVNI BILTEN OPĆINE ILIDŽA



ČAROLIJA ZA OČI I DUŠU

Peti međunarodni dječiji festival folkloru "Ilidža"



18. REDOVNA SJEDNICA OPĆINSKOG VIJEĆA

Budžet Općine Ilidža 30.000.000 KM

Općinsko vijeće Ilidža na 18. redovnoj sjednici održanoj 26. juna u Multifunktionalnoj sali usvojilo je Odluku o rasporedu viška prihoda nad rashodima Općine Ilidža za 2013. godinu. Višak prihoda za 2013. godinu iznosi 5.231.951,27 KM, od tog višak prihoda na sredstvima civilne zaštite iznose 400.406,66 KM, na skloništima 292.906,60 KM i Jedinštenog općinskog organa 4.538.638,01 KM. Višak prihoda namjenskih sredstava raspoređen je u procentima u skladu sa zakonom. Višak prihoda Jedinštenog općinskog organa usmjerena su u skladu sa Odlukom Općinskog vijeća Ilidža za stipendiranje učenika, jednokratne pomoći, udruženja građana, rad javnih ustanova, podsticaj poljoprivredi, tekuće transfere po MZ-a, nabavku imovine i druge kapitalne grantove.

Adekvatno usvojenoj Odluci o rasporedu viška prihoda nad rashodima, razmatrane su i usvojene Izmjene i dopune budžeta za 2014. godinu, tako da Budžet sa 21.550.000 KM usvojen je na iznos od 30.000.000 KM, što je povećanje od 8.450.000 KM. Ovim rebalansom povećani su i izdaci za kapitalne transfere po MZ i transfere za zdravstvo, sa 6.280.000 KM na 10.368.384,56 KM i to: izrade izvedbeno-planske dokumentacije, nastavak saobraćajnice Ilidža-Hrasnica, saobraćajnice uz Željeznicu, asfaltiranje ulica po MZ-a, asfaltiranje uz učešće građana, javnu rasvjetu, uređenje korita, rekonstrukciju mostova, izgradnju sportskih ploha, deminiranje, uređenje parkovskih površina, zbrinjavanje Roma i održavanje zabavnih parkova za predškolsku djecu. Izmjenama i dopunama obezbijedena su i sredstva za izgradnju nove zgrade MZ Vrelo Bosne i Vreoca. Također, rebalansom su obezbijedena sredstva za finansiranje specijalne opreme za Policijsku upravu Ilidža i postavljanje video nadzora na teritoriji općine Ilidža, te druge specijalne i neophodne medicinske opreme za otklanjanje od posljedica elementarnih nepogoda, nabavku vatrogasnog vozila, terenskog vozila za potrebe Civilne zaštite i dr.ž

Načelnik Općine Ilidža prof. dr. Senaid Memić upoznao je Općinsko vijeće da je 111 porodica se prijavilo Komisiji za procjenu šteta, te da im se hitno isplati po 500 KM, što je Vijeće prihvatilo. Rebalansom je izvršena preraspodjela sredstva od Ilidžanskog festivala narodne muzike i Sarajevo film festivala u iznosu od 120.000 KM, za otklanjanje od elementarnih nepogoda kao doprinos Općine Ilidža, te planirana sredstva donatora od 35.000 također za otklanjanje posljedica ugroženih područja na teritoriji cijele BiH.



Jednoglasno prihvaćena Odluka o Gender akcionom planu

Općinsko vijeće na posljednjoj sjednici jednoglasno je donijelo odluku Gender akcionog plana Općine Ilidža 2014.-2016. godine. Gender akcioni plan Općine Ilidža bit će implementiran u periodu 2014-2016. godine. Gender akcioni plan (GAP) Općine Ilidža je strateško-planski dokument općine koji svojom implementacijom treba da potiče budući rast i razvoj zajednice, te unaprijedi ravnopravnost spolova u zajednici. Trogodišnji gender akcioni plan izrađuje se kao okvir za poticanje lokalnih snaga, ali i kao odgovor na izazove budućeg razvoja općine i sveukupnog života u njoj, sa osvrtom na gender aspekt. Gender akcionim planom bit će izvršena analiza postojećih baza podataka Općine Ilidža, unapređenje postojećih i razvoj novih baza podataka Općine, analiza budžeta Općine Ilidža za 2014. godinu sa aspekta rodne jednakopravnosti, formiranje radne grupe i edukacija njenih članova u svrhu izrada budžeta sa elementima programskog gender budžetiranja, a sve u skladu sa Zakonom o ravnopravnosti spolova. Jedan od ciljeva je i povećati uključenost građana/ki u promociju vrijednosti ravnopravnosti spolova kroz prevenciju nasilja, analiza mišljenja javnosti o pitanjima jednakosti i ravnopravnosti spolova, o rodno zasnovanom nasilju i nasilju u porodici, organiziranje informativnih kampanja o prevenciji rodno zasnovanog nasilja i nasilja u porodici, održavajući kampanje i sl.

Edin Hošić novi vijećnik

S obzirom na pravila stranke iz koje dolazi vijećnik Fikret Prevljak (SDA), na sjednici je kazao da će biti kandidat za Skupštinu Kantona i predao je mandat sljedećem na listi po broju glasova iz te stranke. Edin Hošić, sljedeći na listi bit će vijećnik Općinskog vijeća (SDA).



Informacija o stanju vodovodne i kanalizacione mreže

Informacija o stanju vodovodne i kanalizacione mreže na području općine, bila je pred vijećnicima Općinskog vijeća Ilidža na sjednici 26. juna 2014. godine. Na području naše općine egzistira više od 17 lokalnih vodovodnih sistema koji funkcioniraju nezavisno od centralnog vodovodnog sistema. Najveća tri lokalna vodovodna sistema egzistiraju na području MZ Rakovica: Puhovik, Rukodol i Kobiljača. Svi lokalni vodovodni sistemi su vlasništvo stanovnika naselja koji su ih izgradili. Vlasnici imaju pravo i obavezu, da upravljaju istim, a održavanje odnosno mehaničko čišćenje, dezinfekciju i hiperhlorinaciju rezervoara i distributivne mreže, ugradnju hlorinatora, uzimanje uzoraka vode i davanje na kontrolu radi ispitivanja, bakteriološke i fizičko hemijske ispravnosti vode dužni su povjeriti pravnom licu koje je registrovano i specijalizirano za obavljanje tih poslova. U cilju zaštite zdravlja građana Općina je najveće lokalne vodovodne sisteme, iz kojih se snadbijeva većina građana naselja Rakovica, povjerila na održavanje V.D. „Bujice“ Konjic na rok od 12 mjeseci. Trenutno se vrši hlorisanje i kontrola kvaliteta vode za piće na lokalnim vodovodima Rukodol, Kobiljača i Puhovik. Izgradnjom vodovodne mreže na području Rakovice stižu se uslovi prestanka obaveze, hlorisanja i kontrole kvaliteta vode za piće za one lokalne vodovode u čijoj su zoni obezbijeđeni uslovi za priključak svih objekata na gradsku vodovodnu mrežu. Lokalni vodovod Vrela sa 250 priključaka ne hloriše se od septembra 2013. godine. Na ime lokalnog vodovoda Vrela, preuzeta je obaveza hlorisanja i kontrole kvaliteta vode za piće na lokalnom vodovodu Puhovik u MZ Blažuj. Općina putem izabranog pravnog lica, obezbijuje hlorisanje vode, provođenje dezinfekcije i hiperhlorinacije rezervoara i distributivne mreže i ugradnju hlorinatora. Izgradnjom gradske vodovodne mreže na području Rakovice i Blažuja, sukcesivno će se snabdijevanje građana pitkom vodom prenositi na gradski sistem vodosnadbijevanja. Na osnovu podataka kojim raspolaže općinski organ i podataka dobijenih od KJKP „Vodovod i kanalizacija“ d.o.o. Sarajevo, na području Ilidža izgrađeno je 195.500 metara kanalizacione mreže koji je registrovan na katastarskim podlogama. Obzirom da je Ilidža općina koja ima značajne turističke potencijale, neophodno je u narednim godinama planirati veća finansijska sredstva za izgradnju kanalizacione mreže, zajedno sa nadležnim ministarstvima KS i dalje provoditi praksu sufinansiranja projekata sa KJKP „Vodovod i kanalizacijom“.

Izveštaj Komisije za procjenu štete

Usljed obilnih kišnih padavina koje su intenzivirane 14. maja 2014. godine, došlo je do naglog porasta visine vodostaja na svim rijekama i potocima na području općine Ilidža, kao i u većem dijelu BiH. Visina vodostaja, koja do sada nije zabilježena, prouzrokovala je neprohodnost putnih komunikacija, kao i materijalne štete na stambenim, poslovnim, privrednim, infrastrukturnim i drugim objektima, te voćnjacima, plastenicima i dr. , navodi se u Izveštaju Komisije za procjenu štete. Na vanrednoj sjednici Štaba civilne zaštite Ilidža održanoj 14. maja 2014. godine donesen je zaključak da se aktiviraju Službe zaštite i spašavanja organizovane na području općine Ilidža, te da se hitno napravi plan upotrebe i angažovanja građevinskih mašina prema prioritetima. Poplava je trajala dva dana. U tom vremenskom razdoblju nastale su određene materijalne štete na objektima i zemljištu, a jedno lice je i smrtno stradalo utapanjem. Zbog nastalih materijalnih šteta, aktivirana je Komisija za procjenu šteta od prirodnih i drugih nesreća općine Ilidža, koja je formirana Odlukom općinskog načelnika. Pojava epidemija i zaraznih bolesti kod stanovništva i kod životinja nije bilo. Evakuisano je ukupno 14 lica sa ugroženog područja, a jedno lice je smrtno stradalo utapanjem u rijeci Tilavi (Kasindolski potok), 17. maja 2014. godine, a tijelo je pronađeno 08. juna. U većini privrednih subjekata sa poplavljenog područja došlo je do prekida proizvodnje, a nastava u osnovnim i srednjim školama na području općine Ilidža nije obustavljena. Komisiji za procjenu šteta od prirodnih i drugih nesreća podneseno je ukupno 111 zahtjeva za procjenu šteta od strane građana i pravnih lica. Komisija je svaki zahtjev obradila pojedinačno gdje je utvrđeno da je jedan zahtjev nepotrebno podnešen jer nema materijalne štete, a kod jednog zahtjeva je utvrđeno da se imovina ne nalazi na području općine Ilidža, te je isti proslijeđen Federalnoj Komisiji za procjenu šteta. Na osnovu obrađenih svih 111 zahtjeva Komisija za procjenu šteta je utvrdila da je na području općine Ilidža usljed poplava nastala šteta u iznosu od 980 483,93 KM. Komisija za procjenu šteta od prirodnih i drugih nesreća Općine Ilidža je utvrdila da sredstva od posebne namjene za zaštitu i spašavanje, kao i sredstva predviđena budžetom općine Ilidža za tu namjenu nisu dovoljna za otklanjanje posljedica nastalih poplavom, stoga predlaže da se navedena sredstva obezbijede putem Kantonalne, odnosno Uprave civilne zaštite Federacije BiH , te putem određenih donatora i drugih organizacija koje su spremne pomoći ugroženom stanovništvu.

Stipendije za 40 učenika i 50 studenata slabijeg imovnog stanja za 2014./2015. godinu

Općinsko vijeće na 18. redovnoj sjednici donijelo je i Odluku o stipendiranju učenika i studenata slabijeg imovinskog stanja u školskoj 2014/2015. godini. Općina Ilidža će stipendirati 40 učenika sa po 75,00 KM dok će za studentima biti podijeljeno 50 stipendija u iznosu od 100,00 KM. Za učenike srednjih škola za ove namjene iz budžeta izdvojit će se 30.000,00 KM dok će za studente biti izdvojeno 50.000,00 KM.

Informacija o stanju praćenja ugroženosti od poplava

Pred vijećnicima Općinskog vijeća bila je i Informacija o praćenju stanja ugroženosti od poplava na svim rizičnim područjima. Služba civilne zaštite obavila je stručni pregled odbrambenih nasipa, kako bi utvrdila mjesta gdje su neophodne popravke, urađene su sve mjere dezinfekcije, deratizacije i dezinskcije na poplavljenim područjima. Komisija koja je formirana registrovala je štete, a Služba civilne zaštite ažurirala je poboljšanja u Planu odbrane od poplava, na osnovu stečenih iskustava.



Pet putničkih automobila za ratne vojne invalide

U Općini Ilidža 25. juna 2014. godine upriličen je prijem za pet paraplegičara, ratnih vojnih invalida kako bi potpisali i ovlastili špeditera Asa Šped Sarajevo da može izvršiti sve radnje carinjenja putničkih vozila Škoda Octavia koji će im biti dodjeljeni. Automobili sa prilagođenim komandama bit će dodijeljeni Elviru Čavkušiću, Hajdi Halimiću, Mustafi Hot, Nusretu Kalabušiću i Hasi Tajiću. "Zahvaljujemo se Vladi Federacije, Kantonu Sarajevo i Općini Ilidža. Nama je automobil potreban kao nekome obuća a komande su prilagođene našim potrebama", kazao je Haso Tajić, ratni vojni invalid od 1992. godine. Pomoćnik načelnika za boračka pitanja Mirsad Sinanović istakao je važnost ovakvih projekata jer se ne smije zaboraviti učešće i zalaganje ovih ljudi u borbi protiv agresora. Naglasio je i da Općina Ilidža mjesečno izdvaja 200,00 KM za lijekove ratnim vojnim invalidima.



Uručena „Gazela“ načelniku Memiću

Delegacija BH Biznis nagrade „Gazela 2013“ posjetila je 09. juna 2014. godine Općinu Ilidža, kako bi načelniku prof. dr. Senaidu Memiću uručili specijalnu nagradu "Gazela". Prema ocjeni privrednika načelniku je uručena nagrada kao najnačelniku koji podržava razvoj privrede. „Veliko je zadovoljstvo i odgovornost na meni da opravdam ovu nagradu. Zahvaljujem se svima koji su mi dali podršku i nadam se da ću i u budućnosti biti od pomoći ljudima kojima sam potreban kao i lokalnoj zajednici“, rekao je načelnik. Gazela biznis nagradu provode mediji u regiji i Evropi i dodjeljuje se u 14 država. Dodjelu nagrade u BiH po treći put su organizovali Kameleon M&M Group uz pomoć partnera Vanjskotrgovinske komore BiH, Privredne komore FBiH, Ministarstva razvoja, poduzetništva i obrta Federacije BiH, Mostarskog sajma gospodarstva i Republičke agencije za razvoj malih i srednjih poduzeća.

“Penny Plus” d.o.o. donirao čamce

Firma "Peny Plus" donirala je dva čamca Općini Ilidža, odnosno Civilnoj zaštiti za potrebe rada službi zaštite i spašavanja. "Općina Ilidža se zahvaljuje svima koji su se odazvali apelu za pomoć u vidu finansijskih sredstava, hrane, lijekova, odjeće, obuće i drugih materijalnih dobara koje smo mi dalje slali gdje je najpotrebnije. U ovim trenucima koji su iza nas, pokazalo se koliko imamo prijatelja. Hvala dobrim ljudima iz firme "Penny Plus" koji su prepoznali potrebu za ovom donacijom" rekao je načelnik Općine Ilidža prof. dr. Senaid Memić u razgovoru sa predstavnicima ove firme 11. juna 2014. u Općini Ilidža.



Ilidžancima neće nedostajati zelenila - dobit će nove parkove i dječija igrališta

Na lokaciji iza stare zgrade Općine Ilidža u zelenoj oazi gradit će se najzeleniji arhitektonski dragulj. Radi se o poslovno – stambenom objektu koji će sadržavati oko 70 stambenih jedinica kvadrature od 49 do 110 metara kvadratnih. U prizemlju zgrade su planirani poslovni prostori, a u samom podrumu će biti smješten garažni prostor za 70 vozila. „Ovo će biti zgrada za ljude koji znaju

objekat radi se prema Regulačionom planu Ilidža na 11.500 metara kvadratnih koji će biti urađeni po najvišim građevinskim i arhitektonskim standardima. „Planiranim tempom gradnje završetak projekta očekujemo do kraja naredne godine, kada će biti i svečano otvaranje zgrade i uručenje ključeva vlasnicima“, dodaje Mahmutović, naglašivši vrijednost investicije veće od 15 miliona KM.



prepoznati kvalitet i koji za sebe i svoje porodice zahtjevaju isključivo najbolje“, kaže Elvedin Mahmutović, direktor Panamere, koji je istakao kako već imaju veliki broj zainteresovanih kupaca, kako iz BiH, tako i inostranstva, koji su vidjeli idejno rješenje i koji žele da unaprijed rezervišu svoje mjesto u ovom kompleksu“. Stambeno-poslovni

Ilidžancima neće nedostajati zelenila, jer je ovim projektom planirana izgradnja parkova, dječijih igrališta i ambijentalnih zelenih površina. „Moram istaknuti da smo se mi kao društveno odgovorna kompanija, koja je itekako ekološki svjesna, obavezali se da ćemo posaditi isti broj stabala koja su tu bila, za koje smo već izdvojili

13.000 KM, što je bio jedan od uslova na kojem je insistirao načelnik Općine Ilidža prof. dr.Senaid Memić“, kaže Mahmutović, pojašnjavajući kako je većina stabala koja su posječena bila bolesna, stara i kojima je već bilo vrijeme rezanja. U Panameri su prije početka realizacije ovog velikog projekta mislili na sve generacije. U neposrednoj blizini budućeg objekta postoji vrtić, a na ovom području do sada nije bilo igrališta za djecu. „Uvažavajući potrebe građana ovog naselja, kompanija Panamera je odlučila napraviti i jedno dječije igralište i ukoliko bude mogućnosti i sportski teren koji će moći koristiti svi, a ne samo kupci stanova u našoj zgradi“, dodaje Mahmutović. Također, imajući u vidu prirodni ambijent u kojem se gradi i predivno zelenilo samog okruženja, investitor se obavezao da će kompletan prostor oko zgrade napraviti tako da neće odudarati od zelenila koje sada okružuje pomenuti ambijent. Sve to podrazumijeva uređenje zemljišta, sadnju ukrasnih stabala i cvijeća, postavljanje fontane, klupa, uređenje saobraćajnice oko objekta. „Sve ovo znači da će korist od našeg projekta imati svi građani koji budu željeli da odmore dušu i uživaju u zelenilu. Znamo na kakvoj lokaciji gradimo, znamo da se radi vjerovatno o najboljoj lokaciji ne samo u Sarajevu već i u državi i naš tim arhitekata i inženjera imaju tu činjenicu sigurno na umu“, nastavlja Mahmutović, iskazujući zadovoljstvo pokazanim interesovanjem potencijalnih kupaca i potražnjom za njihovim stambenim jedinicama.

Asfaltiranje na području Općine Ilidža

Na području općine Ilidža u Mjesnoj zajednici Otes, završeno je asfaltiranje Oteške ulice u dužini od 177 metara i širini tri metra. Općina Ilidža za ove radove izdvojila je 14.000 KM a radilo se u saradnji sa građanima i to 70 posto Općina i 30 posto učešće građana. Posao je bio povjeren firmi Mevludin Komerc d.o.o. U toku su asfaltiranja, rekonstrukcije ulica Kakrinjski put Braće Bučan i Abdulaha efendije Kantamirije. Stanovnici ulice Kakrinjski put dobit će novi asfalt u dužini od 450 metara i širini od četiri i pol metra. Općina Ilidža je za ove radove iz budžeta izdvojila 75.000 KM . U toku su i radovi ulice Braće Bučan u dužini 235 metara i širini četiri metra. Izvođač radova je firma Sarajevo putevi d.d. a finansijer Općina Ilidža u iznosu od 30.000 KM.Firma KJKP „Rad“ izvodi radove u ulici Abdulaha efendije Kantamirije u dužini od 175 metara i širini četiri i pol metra. Vrijednost investicije je 40.000 KM, a finansira je Općina Ilidža.





Općina Ilidža podijelila 70 plastenika

Općina Ilidža i ove godine nastavlja sa dodjelom plastenika u cilju poticanja poboljšanja poljoprivredne proizvodnje i životnog standarda stanovnika općine. Na prijedlog Komisije za dodjelu plastenika, Općinski načelnik donio je odluku o dodjeli plastenika površine 100 metara kvadratnih, sa dodatnom opremom za 70 osoba. U sali Općine Ilidža 11. juna uručeni su Ugovori o dodjeli plastenika. Načelnik Općine Ilidža prof. dr. Senaid Memić čestitao je dobitnicima plastenika, ističući da će Općina Ilidža i dalje raditi sve u interesu poboljšanja života njenih stanovnika. Za ove namjene iz Budžeta je izdvojeno 213.000 KM. Inače, na javni poziv bilo je prijavljeno 184 kandidata. Hedija Kečo jedna od dobitnica plastenika zahvalila je Općini Ilidža. „Osim što volim da radim oko poljoprivrede ovo će biti način i da svojoj porodici obezbijedim kvalitetno i zdravo povrće. Neću samo svojoj porodici pomagati nego i komšijama i rodbini. Hvala načelniku i Općini koji su nam omogućili ovu vrijednu donaciju“ kazala nam je Hedija Kečo. Kandidati koji su dobili plastenike su: Družba sestara milosrdnica Svetog

Vinka Paulskog – Provincija Majke Divne, Podrug Emira, Tufo Nafija, Alić Ibro, Šahin Šefik, Kolar Ismeta, Muharemović Jusuf, Karaman Mirsad, Urta Slavko, Prljača Hajrudin, Adilović Nazif, Hurić Senada, Palavra Jusuf, Kahvić Senad, Mehmedika Halid, Sejdin Aziz, Podrug Ešref, Bučuk Husejin, Čebirić Avdija, Baberović Mirsad, Lolić Fehim, Omerović Hazim, Bilalović Emir, Jugo Sead, Mahmutović Muhamed, Hondo Smail, Demir Amir, Delić Ziad, Junuzović Ejub, Suljić Fuad, Glavaš Jadranko, Čustović Salko, Čatović Redžep, Gabeljić Hasan, Korman Mirzeta, Vreto Mirzeta, Salković Ferat, Hidović Sabahudin, Bešović Emir, Salihović Hajro, Kečo Hedija, Vreto Amra, Kurtović Hajrudin, Imamović Dženana, Kadić Refik, Kečo Zajim, Čolo Mato, Behlulović Sabaheta, Mušanović Mujo, Oručević Semir, Lendo Zaim, Kadić Sabina, Memić Zarić, Halep Ehlimana, Lugušić Esmira, Mahmutović Naida, Šabanović Salko, Korać Selima, Hromo Suljo, Nurković Mirsada, Čolo Marko, Čolo Blaženka, Isaković Hanifa, Pjevo Ramiz, Kaltak Nusreta, Prljača Mirsada, Mraković Ahmed, Memić Hasija, Botulja Memfad i Brutus Bajro.

Uručeno 10 plastenika povratnicima u Gornji Kotorac

U Općini Ilidža 11. juna upriličeno je uručivanje Ugovora o dodjeli plastenika povratnicima u Gornji Kotorac. Na osnovu javnog poziva Općinski načelnik je donio odluku da se dodjeli 10 plastenika površine 100 kvadratnih metara sa dodatnom opremom povratnicima u Gornji Kotorac. Načelnik Memić je čestitao kandidatima koji su ispunili uvjete konkursa i izrazio nadu da će Općina Ilidža iznaći mogućnosti da i u narednoj godini nastavi sa ovim projektom. Iz budžeta je za ove namjene izdvojeno 31.000 KM. Plastenike su dobili: Behudin Hadžić, Denis Mehmedika, Safet Zec, Vahid Sarajkić, Fuad Mehmedika, Salko Mehmedika, Fikret Mašić, Halil Serdarević, Almin Viteškić i Fehim Mehmedika.

U funkciji tramvajsko stajalište Kasindolska ulica

Od srijede, 25. juna 2014. godine, tramvajsko stajalište Kasindolska ulica stavljeno je u funkciju za sve korisnike gradskog prevoza.



Donirano 17 tona pomoći

Netzwerk Bosnia & Hercegovina in Europa" u saradnji sa Općinom Ilidža donirala 17 tona pomoći. Ova humanitarna organizacija sa sjedištem u Štutgartu je prikupila pomoć za građane nastradale poplavama i klizištima u Bosni i Hercegovini. Odlučili su da tu pomoć stave na raspolaganje Općini Ilidža, te da ona bude njihov servis u distribuciji pomoći za naše najugroženije građane. Dva šlepera robe su 4. juna uskladišteni u namjenskom skladištu, koji je obezbjedila Općina Ilidža za svrhe odlaganja i sortiranja pomoći. Općina Ilidža i načelnik Općine Ilidža prof. dr. Senaid Memić su od prvog dana stavili sve raspoložive resurse u svrhu pomoći građanima Bosne i Hercegovine. „Veoma smo zadovoljni što je „Netzwerk Bosnia & Hercegovina in Europa“ upravo izabrala Općinu Ilidža kao svog partnera u distribuciji robe koju je prikupila naša dijaspora. Općina Ilidža je u kontaktima sa lokalnim zajednicama koje je zadesila ova katastrofa. Pomoć će stići do onih najugroženijih građana“ istakao je prof. dr. Senaid Memić. „Odlučili smo da



pomognemo ljudima u Bosni i Hercegovini čiji su gradovi i domovi pogođeni poplavama i klizištima. Prepoznali smo partnera u općini Ilidža i načelniku Memiću. Naša organizacija je i ranije slala pomoć za Bosnu, učestvovali smo u rekonstrukciji bolnicu u Bijaču koja je izgorjela u požaru, donirali smo tri kreveta za bebe i bolničke krevete“, kazao je Vedad Golubić, direktor ove organizacije. „Netzwerk Bosnia & Hercegovina in Europa“ je dopremila između ostalog bolničke krevete, deke, kolica za invalide, hranu, odjeću itd.



Podijeljena novčana pomoć za četiri ratna vojna invalida

Delegacija Saveza RVI Kantona Sarajevo i Udruženja RVI Ilidža predvođene predsjednicima Ismetom Gurdom i Esadom Delićem su 03. juna 2014. godine posjetili ratne vojne invalide sa područja Ilidže – naselje Osjek, koji su imali štete u proteklom poplavama. Tom prilikom su uručili po 150 KM za četiri člana, kako bi bar malo olakšali i pomogli u sanaciji nastale štete.

Članovi BK KSOR Partizan – Trek tima organizovali akcije pomoći poplavljenim područjima

Našu zemlju je sredinom maja pogodilo nevrijeme, koje se kroz višednevno konstantno padanje kiše pretvorilo u poplave širom naše zemlje, koje su nanijele nesagledive posljedice i uzrokovale poplave u mnogim gradovima. Članovi BK KSOR PARTIZAN – TREK TEAM Sarajevo, samostalno su se organizovali i pristupili pomaganju pogođenim sredinama i to u prikupljanju pomoći u hrani, vodi, higijenskim potrepštinama, garderobi i dr., kako samostalno tako i kroz rad pojedinih članova u Crvenom križu. Tih dana su prvo posjetili naselje



u stanovnike Svraka i donirali neophodnu pomoć, zatim su učestvovali u konvoju koji je vozio pomoć prema Olovu, Vlasenici, Konjević – polju, Janji itd. Pomogli su i u čišćenju gradova Doboj i Maglaj. U centru grada Doboj čistili su i zgradu, gdje su većinom stariji stanari kojima su očistili podrum.



Udruženje antifašista i boraca NOR-a Ilidža posjetili Tjentište

Povodom obilježavanja 71 godine od bitke na Sutjesci, Udruženje antifašista i boraca NOR-a Ilidža su u okviru svog programa rada 14. juna 2014. godine posjetili Tjentište. Delegacija Udruženja položila je cvijeće u prisustvu više hiljada građana i odala dužno poštovanje palim borcima na Sutjesci. Dan kasnije, u Hotelu Rimski most, Udruženje antifašista i boraca NOR-a Ilidža su potpisali Sporazum o saradnji i prijateljstvu sa Društvom za ohranjanje spomina na pohod XIV Divizije Laško iz Slovenije. Sporazum je potpisan u cilju stvaranja i razvijanja međusobnih odnosa i saradnje u oblasti čuvanja sjećanja na događaje iz Drugog svjetskog rata 1941-1945., kao i druge događaje značajne za period rata 1991-1995., u kulturnom, sportskom, obrazovnom i drugim sferama života i rada te razvijanja prijateljskih odnosa.


Održan Memorijalno-historijski susret Odbrana Donjeg Kotorca

Memorijalno-historijski susret „Odbrana Donjeg Kotorca“ i Dan ove mjesne zajednice obilježeni su 13. juna polaganjem cvijeća na spomen-obilježje poginulim borcima, učenjem Fatihe i prigodnim kulturno-umjetničkim programom. Posjetio ci su se prisjetili „Prve kotoračke bitke“ i presudnih događaja koji su se odvijali na ovim prostorima u toku ratnih godina. Cvijeće su položile delegacije Općine Ilidža, boračkih udruženja i porodica šehida i poginulih boraca. „Danas se navršavaju 22. godine od prve Kotoracke bitke. Te subote, 13. juna počela je i danima se vodila odlučujuća bitka i ključna odbrana od prvog masovnog napada agresorskih snaga na ovaj dio slobodne Ilidžanske teritorije, čijim zauzimanjem bi Sarajevo ostalo potpuno odsječeno i blokirano a postojanje BiH bi bilo neizvjesno. Donji Kotorac je bila važna vojna pozicija, kako za nas, tako i za agresora. Hrabri borci Butmira uzvratili su napad i odbranili naselje. Nažalost, tada je poginuo mladi oficir Nedžad Delić koji je napustio JNA. Krenuo je sa borcima na oklopnjake i jedinom zoljom pogodio je transporter, a svežanj bombi bacio je pod tenk. Četnici su iz trave otvorili vatru i jedan snajperista je pogodio Nedžada. S druge strane stigao je i Bajram Hasanović, ispalio osu na drugi tenk. Nije ga pogodio ali agresori su shvatili da naši borci nisu bez



„Akcija-pokušaj deblokade Rakovice“ i Dan Mjesne zajednice Rakovica

U organizaciji Općine Ilidža i Jedinstvene organizacije boraca Unija veterana Ilidža, 06. juna održan je Memorijalno-historijski susret „Akcija-pokušaj deblokade Rakovice“ i Dan MZ Rakovica. Zajednička delegacija Općine Ilidža i Unije veterana, kao i predstavnici UABNOR-a Ilidža, položili su cvijeće na spomen obilježje, proučili Fatihu i odali počast svim poginulim borcima Rakovice. Prisutni suborci skupili su se kako bi evocirali uspomene na taj dan, a učenici Devete osnovne škole izveli su prigodan kulturno-umjetnički program. Za najbolje literarne radove nagrađene su učenice Azra Pašić prvo mjesto, Amina Redžepagić drugo i Meliha Čolpa treće mjesto.



protivoklopnih sredstava. Nažalost, Nedžad Delić nije preživio ovaj napad, dok je Bajram Hasanović uspio da preživi ali je kasnije poginuo. Sjećam se zajedništva koje je spontano nastalo. Svi mi preživjeli čuvat ćemo uspomenu na poginule borce i mladim generacijama pričati da se nikada ne zaboravi“, prisjetio se Mirsad Mirojević, član komande Četvrte viteške motorizovane brigade. Smiljana Viteškić, predsjedavajuća Općinskog vijeća Ilidža rekla je da će Općina Ilidža i dalje nastaviti u saradnji sa boračkim udruženjima njegovati ovakve datume i obilježavanja. „Ovdje se odigrala bitka veoma važna za odbranu ovog dijela Ilidže. Slabo naoružani, nedovoljno organizovani i neopremljeni borci, naši heroji su se oduprijeli mnogostruku jačem neprijatelju. Bili su spremni da daju svoj život i to nikada ne smijemo zaboraviti“, dodala je Smiljana Viteškić. Memorijalno –historijski susret održan je u organizaciji JOB „Unije veterana“ i Općine Ilidža.

Podružnica 10 Udruženja Četvrte viteške motorizovane brigade obilježila svoj dan

Formirana kao Četvrta motorizovana brigada, preimenovana kasnije u 104. motorizovanu brigadu poznata je i kao Četvrta viteška brigada, koja je brojala 5000 vojnika i držala liniju od 51 kilometar, sastojala se od četiri bataljona, protivoklopne čete, artiljerijskog divizionara, specijalne jedinice "Fikrini diverzanti" inženjerijskog bataljona, logističkog bataljona vojne policije i vojne bolnice, ostatak će zauvijek upamćena u srcima svih građana Ilidže. Organizacioni odbor za obilježavanje godišnjice Podružnice 10 nekadašnji Četvrti motorizovani bataljon, postigao je svoj cilj, evocirane su uspomene i susreli su se nekadašnji saborci. U Podružnici 10, obilježen je 13. juni 2014. godine Dan podružnice i to nizom kulturno-sportskih aktivnosti. Centralna manifestacija održana je 11. juna 2014. godine u Domu kulture u MZ Butmir. U sklopu programa koji je trajao nekoliko dana, 29. maja 2014. godine održan je historijski čas sa učenicima Osme



osnovne škole "Amer Čenanović". Ispred škole 5. juna organizovan je turnir u malom nogometu za učenike Osme osnovne škole "Amer Čenanović" na kojem su pobjedničke ekipe zasluženo nagrađene peharima i medaljama. Poslije akšam namaza, 06. juna, učenjem Jasina u džamiji u Butmiru svi prisutni su se prisjetili šehida Četvrtog motorizovanog bataljona koji su dali svoje živote za oslobođenje i odbranu Ilidže. Pripadnici Podružnice 10 učestvovali su na turniru u šahu koji je održan 07. juna 2014. godine u prostorijama Osme osnovne škole "Amer Čenanović". Džeko Škrijelj je osvojio pehar i medalju za prvo mjesto, Faruk Tahirović medalju za drugo i Mersudin Laković za treće mjesto. Svi učesnici su dobili zahvalnice za učestvovanje na turniru. Pored šahovskog, održan je i turnir u malom nogometu između podružnica Udruženja Četvrte viteške motorizovane brigade, na kojem je učestvovalo sedam ekipa. Pobjednicima prva tri mjesta su uručene nagrade i to za prvo mjesto 300 KM, drugo, 200 KM i treće 100 KM. Prvo mjesto odvojila je ekipa Trećeg motorizovanog bataljona, a drugo i treće mjesto osvojila je ekipa



Četvrtog motorizovanog bataljona. Program obilježavanja Dana Podružnice 10 obogaćen je takmičenjem literarnih radova učenika Osme osnovne škole "Amer Čenanović" na temu "Ja sam ljljan, a to znači..." Prva tri mjesta na ovom takmičenju pripala su učenicama Rukaji Fijuljanin, Zejneb Fijuljanin i Anesu Čenanoviću. Predstavnici Podružnice 10 posjetili su i porodice šehida Nedžada Delića i Bajrama Hasanovića. Predsjednik Podružnice 10 izrazio je zahvalnost svima koji su podržali i učestvovali u organizovanju aktivnosti. "Posebno se zahvaljujemo Općini Ilidža, općinskom načelniku prof. dr. Senaidu Memiću, Osmoj osnovnoj školi "Amer Čenanović", KUD "Ekrem Mujkić", prvom komandantu Butmira Huseinu Hasiboviću, te firmama Zond i Hoše Komerc", rekao je Izet Hurić, predsjednik Podružnice 10.

Članovi Savjeta Mjesne zajednice Osjek očistili prostorije

Članovi Savjeta Mjesne zajednice Osjek su 15. juna očistili objekat mjesne zajednice i prostor oko nje, pokosili travu i uredili zelenu površinu. Planiraju i u narednom periodu jednom mjesečno nastaviti sa ovim aktivnostima.



Općinska izborna komisija održala sastanak sa sekretarima mjesnih zajednica



Povodom izlaganja privremenog biračkog spiska Općinska izborna komisija je, 13. juna 2014. godine, održala sastanak sa sekretarima 16 mjesnih zajednica sa područja općine Ilidža. Sekretari su upoznati sa zakonskim rokovima, te su angažovani na realizaciji privremenog biračkog spiska. Sekretari će imati obavezu da omoguće sve potrebne informacije kako bi građani mogli provjeriti da li se nalaze na biračkim spiskovima. Podsjećaju se građani da će uvid u Izvod privremenog biračkog spiska moći izvršiti u periodu od 14. juna do 14. jula 2014. godine, od 08,00 do 16,00 sati u prostorijama mjesnih zajednica. Također, uvid će se moći izvršiti i u Centru za birački spisak u zgradi Općine Ilidža, soba br. 15 u terminu od 08,00 do 18,00 sati. Raseljena lica sa područja općine Ilidža će samo u Centru za birački spisak moći izvršiti provjeru svojih podataka kao i opredijeliti se za biračku opciju podnošenjem zahtjeva (obrazac PBO-1) do 29. jula 2014. godine. Birači koji uoče nepravilnosti i pogrešne podatke imaju pravo zahtjevati ispravku ličnih podataka. Za sve dodatne informacije građani se mogu obratiti Centru za birački spisak putem telefona: 033 775 617, 033 763 465 ili na e-mail: biracki@opcinailidza.ba.

Imenovano 16. kandidata u upravne i nadzorne odbore javnih ustanova


Nakon okončane procedure izbora upravnih i nadzornih odbora za javne ustanove čiji je osnivač Općina Ilidža, mandat na četiri godine dobilo je 16 kandidata. Elvir Kazazović, predsjednik, Zijad Suljić, Alma Avdić, Elvira Hošić i Adis Durmo imenovani su u Upravni odbor JU Kulturno-sportski i rekreacioni centar Ilidža. U nadzorni odbor ove ustanove imenovani su Merima Imamović, a članovi su Alem Holjan i Sabina Memić. Dino Mulaosmanović predsjednik je Upravnog odbora JU za kulturu, sport i rekreaciju Hrasnica-Ilidža, a članovi su Zulfo Ahmetović, Kemal Lojo, Lejla Mušanović, Salko Ibrahimović. Nadzorni odbor ove ustanove činit će u naredne četiri godine: Rašid Šehović- predsjednik i članovi Muamer Gegaj i Nijaz Hrnjić.

Otvorene kancelarije IV PU Ilidža na prostoru sedam mjesnih zajednica

Za građane mjesnih zajednica Hrasnica I, Hrasnica II, Sokolović-Kolonija, Butmir, Donji Kotorac, Rakovica i Blažuj otvorene su kancelarije IV PU Ilidža za rukovodioce sektora. Kancelarije IV PU Ilidža se nalaze na adresama i to drugi sektor: Hrasnica I, u ulici Trg branilaca Hrasnice bb, koji obuhvata mjesne zajednice Hrasnica I i Hrasnica II, treći sektor: Sokolović-Kolonija, u ulici Trg 22. aprila br. 10, koji obuhvata mjesne zajednice Sokolović-Kolonija, Butmir i Donji Kotorac i šesti sektor: Rakovica, u ulici Rakovička cesta br. 341, koji obuhvata mjesne zajednice Rakovica i Blažuj. Građani se mogu obratiti policijskim službenicima svakim radnim danom na već pomenutim lokacijama u vremenu od 10,00 do 12,00 sati."


Visokoobrazovanim mladim ljudima pružena šansa

Od 2010. godine Općina Ilidža pruža priliku mladim visokoobrazovanim ljudima da steknu radna iskustva i polažu stručni, upravni ispit. Tu priliku od 2010. godine dobilo je njih 167. Volonteri su već četiri godine sastavni dio svih službi, koji kroz svoje djelovanje unapređuju rad Općine, ali i dobivaju priliku da uče i usavršavaju znanje koje će ih jednog dana učiniti profesionalcima svoje struke. Volonterski rad traje 12 mjeseci i za to vrijeme volonteri imaju priliku boraviti u nekoliko općinskih službi kao i u mjesnim zajednicama. Kroz jednogodišnje volontiranje upoznaju se sa svim segmentima rada Općine kao lokalne jedinice samouprave ali i sa uposlenicima koji su mentori u svim aktivnostima koje oni rade u toku volontiranja. Nakon odrađene godine dana, ovi mladi i obrazovani ljudi dobit će potvrdu o volontiranju koja će im garantovati iskustvo i zasigurno biti od koristi pri apliciranju na poslovne konkurse. O tome kako volonteri doživljavaju svoj angažman u Općini Ilidža i šta njima znači ovakav vid profesionalnog usavršavanja čitajte u nastavku.



Alma Muhović

Volontiranje u Općini Ilidža će mi mnogo značiti s obzirom da mi je ovo prvo radno iskustvo. Mislim da se Općina dobro organizovala po pitanju volontera i što se tiče rotacije, koja nam omogućava da prođemo kroz više službi i samim tim upoznamo način rada općine.



Farid Bešlić

Ova godina volontiranja mi je jako bitna, obzirom da mi niko prije nije pružio priliku da dobijem iskustvo u svojoj struci i naravno da će mi koristiti za neko buduće zaposlenje. Što se tiče učenja i sticanja znanja, najprije bih zahvalio svom mentoru koji mi je dosta pomogao i olakšao rad i volontiranje. Pored mentora zahvalio bih se i šefici Službe zajedničkih poslova, ostalim zaposlenicima, samoj Općini Ilidža kao i načelniku.



Neda Mujačić

Zahvalna sam na ovoj prilici jer sam naučila mnogo, s obzirom da sam na ovo profesionalno iskustvo čekala osam godina. Mislim da će mi svakako koristiti u daljem traženju posla i jako sam zahvalna Općini Ilidža i načelniku na pružanju ovakve prilike.



Mirza Džebo

Kao prvo radno iskustvo nadam se da će mi puno značiti. Naučio sam mnogo i zahvaljujem se načelniku koji mi je dao priliku da radim u svojoj struci. Naučio sam na koji način radi i funkcionise općina kao lokalna organizacijska jedinica i kakva je njena struktura.



Amina Barac


Volontiranje u Općini mi znači prvenstveno zbog radnog iskustva. Trenutno u službi u kojoj volontiram naučila sam mnogo i mislim da ću do kraja volontiranja naučiti još više. Smatram da će mi ovo iskustvo doprinijeti i u budućnosti, jer sam do sad naučila jedan novi vid komunikacije i kako da se ophodim prema radnim kolegama i strankama.

Željela bih se zahvaliti načelniku Općine na odabiru. Nadam se da će ova godina volontiranja pomoći u mom daljem profesionalnom iskustvu. Do sada sam imala dosta prilika za učenje posebno mislim na iskustvo koje sam dobila u službi u kojoj trenutno volontiram.




Kristina Lovrić

Drago mi je što sam dobio priliku da volontiram i da se na ovakav način profesionalno usavršavam. Trudit ću se da dam svoj maksimum kako bi doprinio radu i kako bi teorijsko znanje koje sam stekao na fakultetu pretočio u praksu. Zahvalan sam Općini Ilidža i načelniku koji su nam pružili priliku i omogućili volontiranje.



Vahidin Šenderović

Zahvaljujem se načelniku što je ovako velikom broju mladih ljudi pružio priliku da volontiraju. Neizmerno sam zahvalna na ovom iskustvu, jer prije nisam imala priliku raditi u nekom državnom organu i smatram da je ovo idealna prilika da se upoznam sa načinom rada Općine Ilidža, ali i sa svim volonterima i uposlenicima.



Lejla Boloban

Ova godina volontiranja će nam pomoći u svrsi polaganja stručnog ispita pri apliciranju na posao. Na taj način ćemo imati taj bod plus, moći ćemo se prijavljivati na više konkursa. U Općini sam se susreo sa novim ljudima i sa novim poslovnim i profesionalnim izazovima.



Abdurahman Šljivić

Mislim da je ovo jedno super iskustvo. Ova godina će mi dosta značiti za ubuduće, pri traženju posla, jer nam u dokumentaciji za aplikaciju na posao uglavnom traže radno iskustvo. Za dosta stvari koje smo na fakultetu učili imala sam priliku da u Općini vidim kako to izgleda u praksi.



Aida Pintol



Općina Ilidža novčano nagradila najuspješnije učenike

U Multifunkcionalnoj sali Općine Ilidža, 12. juna 2014. godine, načelnik Općine Ilidža prof. dr. Senaid Memić je upriličio prijem za učenike osnovnih i srednjih škola koji su u školskoj 2013/2014. godini osvojili jedno od prva tri mjesta na kantonalnom, federalnom i državnom nivou. Novčano su nagrađena 52 učenika od toga pojedinačne nagrade je dobilo 19 učenika i devet ekipa koje čine ukupno 37 učenika. Načelnik prof. dr. Senaid Memić je pohvalio sve učenike i zahvalio im na izvanrednim uspjesima kojima su na najbolji način predstavili svoje škole i općinu Ilidža. „Budite vrijedni, nastavite sa radom i budite uporni u svojim nastojanjima da radite ono što volite i budete najbolji u tome. Vi ste najbolji među jednakima i samo tako nastavite“, poručio je nagrađenim učenicima načelnik.



Učesnici CIVITAS ljetne škole posjetili Općinu Ilidža

U Multifunkcionalnoj sali Općine Ilidža, 23. juna 2014. godine, upriličen je prijem za preko 60 učenika osnovnih i srednjih škola iz cijele Bosne i Hercegovine, učesnika CIVITAS ljetne škole. Tokom posjete učesnici su imali priliku vidjeti zgradu Općine, upoznati se sa osobljem, radom službi i razgovarati sa načelnikom prof. dr. Senaidom Memićem. U Multifunkcionalnoj sali održana je prezentacija o radu lokalne samouprave, što je i tema ovogodišnje obrazovne komponente CIVITAS ljetne škole. Na prijemu su bili prisutni članovi Komisije za obrazovanje, kulturu, fizičku kulturu i pitanja mladih Općinskog vijeća Ilidža koji su informisali prisutne o radu Komisije i odgovarali na pitanja učenika. Načelnik Memić se obratio prisutnim učesnicima i zahvalio im na dolasku. „Počasćeni smo posjetom ovako velikog broja mladih i uspješnih ljudi iz cijele Bosne i Hercegovine. Nadam se da ćete nastaviti biti uspješni u onome što radite, da ćete prihvatiti dobre navike, a kloniti se loših. Znajte da ste u Općini Ilidža uvijek dobrodošli“, rekao je načelnik.

Učenici iz Hamburga na prijemu kod načelnika

Druženje i akcija u okviru zajedničkih projekata postali su tradicija učenika Četvrtе gimnazije i srednjih škola iz Hamburga. Osmu godinu zaredom provode projekte, pa tako i ovog juna, 16 učenika iz Njemačke (Hamburga) zajedno sa učenicima iz Četvrtе gimnazije snimaju četiri kratka dokumentarna filma. U Općini Ilidža 17. juna 2014. godine, načelnik Općine Ilidža prof. dr. Senaid Memić poželio je dobrodošlicu gostima iz Hamburga i izrazio zadovoljstvo nastavkom dugogodišnje saradnje. „Uvijek ste dobrodošli u našu Općinu. Mi se također na Ilidži imamo čime hvaliti jer naši mladi ljudi svuda ostvaruju uspjehe. Naši gimnazijalci su sigurno dobri domaćini te se nadamo da ovakvi i slični projekti samo mogu pomoći omladini koja je potencijal ove države“, kazao je, između ostalog, načelnik Senaid Memić, koji je gostima iz Hamburga uručio Monografiju „Ilidža“ i zahvalio im se na posjeti.

Prijem za učesnike Dječijeg festivala folklor



U Općini Ilidža 20.juna 2014.godine upriličen je svečani prijem za učesnike Petog međunarodnog dječijeg festivala folklor „Ilidža“. „Velika je čast biti domaćin ovog festivala koji je već prerastao u tradiciju. Nadam se da ćete sa Ilidžance ponijeti samo lijepe uspomene i da ćete za sve Ilidžance prirediti doživljaj za oči i dušu“, kazala je dr. Smiljana Viteškić predsjedavajuća Općinskog vijeća. U toku posjete gosti i domaćin, Općina Ilidža, su razmijenili poklone kao znak pažnje i sjećanja na ovaj susret. Gosti nisu krili svoje oduševljenje posjetom Ilidži i Bosni i Hercegovini, ističući da su podjednako oduševljeni ljepotama grada i gostoprimstvom domaćina.

Održan Peti međunarodni dječiji festival folklor „Ilidža“

Općina Ilidža bila je domaćin Petog međunarodnog dječijeg festivala folklor Ilidža održanog 20. i 21. juna na Ljetnoj pozornici na Ilidži. Dječiji ansambli iz deset zemalja, Albanije, Bugarske, Crne Gore, Makedonije, Kipra, Rumunije, Rusije, Srbije, Turske i Bosne i Hercegovine su puštanjem jata bijelih golubova najavili spektakularan događaj. Festival je u ime načelnika prof.dr. Senaida Memića otvorila predsjedavajuća Općinskog vijeća Smiljana Viteškić koja je pozdravila prisutne i poželjela dobrodošlicu i lijep ugođaj svim gostima ove manifestacije. Organizator festivala je Udruženje za djecu i mlade „Nominativ“. „Festival je tradicionalan, međunarodnog je karaktera i namijenjen je za djecu iz cijelog svijeta starosne dobi od osam do dvanaest godina. U sklopu festivala, gosti



će imati mogućnost posjete sve važnije kulturno-historijske znamenitosti na području Ilidže. Cilj je okupiti što više djece na jednom mjestu, pod istim krovom i sa istim motom a to je očuvanje tradicije, razvijanje prijateljstva, kulturnog i socijalnog duha, širenje ljubavi, tolerancije i mira među djecom“, rekao je direktor festivala Džemal Hurić. Više od 500 mališana u tradicionalnim kostimima svoje zemlje, prodefiliralo je pozornicom, što je oduševilo sve prisutne koji su popunili Ljetnu pozornicu do posljednjeg mjesta i uživali u bogatom festivalskom programu. Na festivalu su prisustvovali i delegati Međunarodnog savjeta organizatora folklor i tradicionalne kulture (CIOF) iz osam država.





Otvorena džamija u naselju Lužani

U naselju Lužani je 27. juna upriličeno otvorenje džamije. Svečanom otvorenju prisustvovalo je više od 500 posjetilaca. Preljepu džamiju u srcu Ilidže projektovala je prvi put u historiji Balkana, žena- Bisera Korjenić koja je istakla da joj je inspiracija bila islamska arhitektura zastupljena na našim prostorima a ipak prilagođena 21. stoljeću. Ključ u bravu džamije koju je sagradio, prvi je stavio vakif Saljo Mrkulić uz učenje tekbira. Tom prilikom je i klanjao džuma-namaz.



„Trka za Evropu“

Evropski pokret u BiH u saradnji sa Općinom Ilidža organizovao je 04. juna 2014. uličnu trku „ Trka za Evropu“ za učenike osnovnih i srednjih škola sa Ilidže. Učestvovalo je 80 učenika, 40 osnovaca i 40 srednjoškolaca. Nagrađeno je 12 učenika. Pobjednici među dječacima osnovcima su Arnes Junuzović, Fatih Sadiković i Miralem Solak . Nagrađene su i djevojčice osnovnih škola Anelida Durmo, Merjem Čelik i Lejla Adilović. Među srednjoškolcima , u muškoj konkurenciji prvo mjesto je osvojio Amar Šikalo, drugo Muhamed Milišić i treće Emir Hadrović, dok je u ženskoj konkurenciji prvo mjesto osvojila Anisa Leka, drugo Merisa Čemo i treće Džemila Hadžić.

Italijanski kamperi u posjeti Općini

Delegacija italijanskih kampera iz grada Basano del Grapa, predvođena župnikom Crkve uznesenja blažene Djevice Marije-Stup Miroslavom Čavarom posjetila je 16. juna Općinu Ilidža. Sa rukovodstvom Općine Ilidža razgovarano je o unaprijeđenju saradnje na historijskom, turističkom i humanitarnom nivou. „Impresije koje smo ovdje doživjeli prenijeti ćemo našem gradonačelniku. Ilidža, Sarajevo je bezbjedan grad, ova naša posjeta je nastavak saradnje župe Stup, Općine Ilidža i grada Basano del Grapa“, rekao je u svom obraćanju predstavnik italijanskih gostiju Danilo Canesso. Gostima je načelnik prof. dr.Senaid Memić uručio Monografiju Ilidže i zastavu Bosne i Hercegovine. „Želim da se na Ilidži osjećate sigurno i da pričate o ljepotama i o pozitivnim iskustvima. Vi ste naši prijatelji i uvijek ste dobrodošli. Stojim Vam na raspolaganju, moja je čast što sam Vas ugostio“, kazao je prof.dr. Senaid Memić.





Ilidžanci ostvarili zapažene rezultate na Balkan Open 2014.

U Tešnju je 14. i 15. juna održano Internacionalno takmičenje u kick boksu Balkan Open 2014. Učestvovalo je 500 takmičara iz 11 zemalja. Takmičari iz Kick boxing akademije „Ilidža“ ostvarili su zapažene rezultate. Asmir Tahirović u kategoriji -67 kg osvojio je zlato, dok je Edin Sinanović u kategoriji -60 kg osvojio srebro. „Ovo je bila provjera pred nastup na svjetskom juniorskom prvenstvu koje će se održati u Italiji u septembru „ kazao nam je trener Kick boxing akademije Nermin Bašović.



Udruženje „Zlatna ruka“ u Maglaju i Srebrenici

Članice udruženja Zlatna ruka su 28. juna posjetile Maglaj i učestvovala u čišćenju zgrada osnovne škole i Općine Maglaj. Ugroženom stanovništvu podijelile su pakete pomoći, higijenske potrepštine, namirnice i flaširanu vodu. Osim Maglaja, članice ovog udruženja su posjetile i Srebrenicu 21. juna i uručile pakete sa hranom i odjećom.

BK Trek timu baronzana medalja u drugom kolu Premijer XC lige

Takmičarski ekipa BK Trek Team u sastavu Kenan Bajrić, Benjamin Mahić i Avdo Šerak učesnici su drugog kola Premijer XC lige u Vitezu. Kenan Bajrić, nakon prvog kruga je držao čvrsto prvo mjesto ali nespavanje i radna predhodna noć je uzelo danak, na kraju je završio kao treći i donio klubu novu bronzanu medalju. Nakon toga nastup je imao Avdo Šerak koji je u Master kategoriji završio na četvrtom mjestu. U kategoriji juniora Benjamin Mahić je završio na osmom mjestu.



Boćarski klub „Napredak“ u polufinalu Kup-a BiH

Utakmica četvrtfinala Kupa BiH koja je održana 06. juna 2014. godine, završena je rezultatom 7:2 za boćarski klub „Napredak“. Ovom pobjedom boćari Napredka su se plasirali u polufinale Kupa BiH. Nastavak takmičenja zakazan je u prvoj polovini septembra.





RIMSKI MOST

Ilidžanski dragulj star više od 500 godina

Prelazak preko riječice Bosne u neposrednoj blizini njenih izvora riješen je podizanjem kamenog mosta na putu iz Ilidže prema Blažuju. Most je podignut između 1530. i 1560. godine. Građen je od pravilnih, klesanih blokova krečnjaka, dugačak je 40 a širok četiri i pol metara. Konstrukcija mosta izvedena je na sedam lukova, uzlazno-silaznom linijom karakterističnom za osmansku mostogradnju. Prvi spomen ovog mosta donosi mletački poslanik Catarino Zeno koji je posjetio Sarajevo 1550. godine. Na putovanju ovom dionicom puta prešao je rijeku Bosnu preko „kamenog mosta sa sedam lukova“. Smatra se da je nacrt izišao iz radionica poznatih osmanskih graditelja a da je izveden od strane domaćih graditelja. Ovaj lijepi osmanski most često se naziva „Rimskim mostom“ što je potpuno pogrešno. Možda je razlog za upotrebu ovog naziva i činjenica da se i sada u konstrukciji mosta mogu vidjeti sekundarno urođeni ostataka rimske arhitekture i rimskih kamenih reljefa. Na temelju analiza prometnih pravaca i razvoja naselja može se pretpostaviti da je na tom mjestu u rimsko doba postojao most po čijem je uzoru ili na čijim je temeljima u vrijeme Osmanske uprave izgrađen novi most. U više navrata most je pretrpio oštećenja pa su uslijedile prepravke među kojima su najznačajnije ove iz 1762,1776 i 1952. Godine.